

■ CONVIVENZA

VIP per in'uretta

DA FADRINA HOFMANN*

Ina dumengia en damaun il favrer. Mia figlia è tar sia meglra amia durant la fin d'emna. Mes figl na po betg ir cun skis u far passlung perquai ch'el ha ina ferida vi da la chanvella. Igl è in di da bellezza. Jau hai in termin cun in trenader da chavals al White Turf a San Murezzan. Mes figl ha pauca veglia da m'accumpagnar. L'alternativa fiss dentant da star l'entira damaun a chasa sulet e quai n'è per mai nagin'opziun. Stgisa figl, jau sun la scheffa, ti stos questa giada far d'assistent da pressa. Er il chaunsto numnadamain vegnir cun nus a lavurar, oramai ch'el è anc memia giuven per star pliras uras sulet. Il chaun s'allegra almain da pudair esser da la partida.

In'ura pli tard stain nus trais davant la tenda da VIP sin il lai schelà da San Murezzan. Nus survegnin bindels da VIP, passain la controlla e vegin beneventads dad in mund che fa star stut mes figl. «Wow, ti n'has betg ditg che quai saja uschè cool qua», manegia el tut impressiunà.

La tenda da VIP è numnadamain plitost insatge sco in areal da messa per ritgs. I dat restaurants fitg elegants, in stan dad austras ed in da vatta da zutger. Plinavant hai là ina lounge cun sofas e sutgas patgificas e quella è pli



gronda che nossa stiva a chasa. Sin ina maisa vegn vendida vestgadira da pel-litscha, tar l'autra ha la gliעד la pussaivladad da far scumessas. E lura vesa mes mat las tualettas, quel-las al fascineschan il pli fitg. Na, quai n'èn betg toitois sco quels per l'uschenumnà «pievel simpel» dador la tenda da VIP. Qua datti endretgas tualettas nairas, endretgs mini-sientamauns alvs ed endretgs lavabos en aur. Nus giain gist duas giadas sin tualetta perquai ch'igl è uschè bel. E nus essan segir ils unics che fashain in selfie en la tualetta sin il Lai da San Murezzan.

Apaina che nus essan en la lounge d'ina marca d'uras svizra per far l'intervista vegn ina camariera en costum blau marin e porchas schampagn, suc d'oranschas ed aua minerala. Il chaun survegn natiralmain in'atgna cuppa cun aua e biscuits d'ina marca ch'jau na fiss mai capabla da pajar.

Mes figl daventa adina pli allegher en sia sutga cuvernada cun pail artificial. Il trenader da chavals è in um amiaivel, las respostas dat el da maniera rutinada e dal schampagn baiva el be trais siervs, sco ch'i tutga per VIPs. L'intervista cun fotografia è fatga suenter 20 minutas. «Ed ussa pudain nus puspè ir a chasa», di jau a mes figl. Quel ma guarda tut indignà. «Segir betg, ussa hai jau fom ed jau vuless anc vesair las cursas da chavals e la dunna a l'entrada ha ditg ch'jau duaja vegnir per in pèr ursets da gumma...»

Dimena sesain mes figl, il chagniel ed jau giu sin la terrassa da VIP, mangiain raclette, guardain las cursas da chavals e fashain schizunt ina scumessa. Donn che nus avain fatg quella be tranter da nus: Nus avessan gudagnà bainquant dapli che be dus pugns plain ursets da gumma or dal vaider d'aquari dasper l'entrada da la tenda. Cun bandunar la terrassa manegia mes figl satisfatg: «Dad esser VIP pudess jau anc ma disar.» Jau crai ch'jau stoss en l'avegnir ponderar meglier nua che jau prend cun mai mes figl. E forsa era mes chaun: Quel ha numnadamain anc auzà sia chomma avant che partir.

* Fadrina Hofmann è redactura tar la «Südostschweiz» e viva cun sia famiglia a Scuol.